

նի ձիաւոր հայ առաջնորդները հեռուից տեսնում են հայրենի լեռը՝ «Մասի՛սը, Մասի՛սը» կանչում են, թէ՛ նրանց աչքերը ի տես սուրբ լեռան փայլում են ուրախութիւնից, որի հանդէպ նրանք մանկական ակնածանք են տածում»:

Ապա իմանում ենք, որ երբ Վագներ մի քանի ամիս յետոյ Ուրմիայից Սալմաստի վերայով կրկին գալիս է պարսիկ-տաճկական սահմանը, այդ կողմերը վտանգուած են լինում աւելի քան երբեք՝ քուրդ աւազակաբարոյ ցեղերի ձեռքից:

Առհասարակ այդ կողմերը Քրդստան է անուանում Վագներ:

Վագներ շատ դո՛հ է, հպարտ, որ ինքն է առաջին անգամ այդ կողմից Արարատի լանջի վրայ ոտք դնող զիտնական ճամբորդը, որ՝ իրենից առաջ եւ ոչ մէկ զիտուն ճամբորդ եւ ոչ մի ուղեւոր այս կողմերում ոտք չէ դրել: Բայց նա դերձ չէ երկիւղից, թէ՛ մի գուցէ աւազակաբարոյ քրդերը իր կեանքին վտանգ սպառնան: Նա չէ մոռացել իր նախորդներից ոմանց՝ Youbert-ի, Schulz-ի եւ Brawn-ի տխուր ճակատագիրը նոյն այդ վայրերում:

Ինչպէս Մասիսի հիւսիսային, այնպէս նաեւ այս՝ հարաւային լանջերի համար Վագներ յատկանշանական է համարում աղբիւրների, ջրի կատարեալ պակասը: «Լեռան այս կողմում ծառեր ամենեւին չկան: Մնացած բուսականութիւնը կրում է միջին-եւրոպական բնոյթ: Տակաւին ԹուրնըՔորը, առաջին բրնախոյզը, որ Արարատ սարն այցելեց, զարմացած էր մնացել այն մեծ նմանութեան վերայ, որ կայ նրա եւ մեր միջին-եւրոպական լեռների բուսականութեան մէջ»:

Մասիսի հարաւային լանջերին երկու օր մնալուց յետոյ Վագներ վեադառնում է Բայազետ եւ այնտեղից էլ ճամբան շարունակում դէպի Էրզրում: Ամբողջ չորս ամիս շարունակ Հայաստանի, Քրդստանի եւ Պարսկաստանի ալպեան տեսարանը դիտելուց կշտացել էի թէ՛ եւ, բայց էլի չէի ուզում բաժանուել»...

\* \* \*

Յուլիս 1-ին (1843) Վագներ, դարձեալ Արովեանի (եւ ուրիշների) ուղեկցութեամբ, էջմիածնից ճամբայ է ընկնում՝ Արագած սարը բարձրանալու նպատակով: Նրա ասելով՝

«Հայաստանի գրեթէ անծանօթ այդ շրջանը մինչ այն ոեւէ եւրոպացի ճամբորդ այցելած եւ նկարագրած չէ եղել, թէ՛ Պարթոս եւ Քոխ միայն անցել են այդ կողմերով, Արարանի ճամբայով: Իսկ մի ուրիշը, Carteron, թէ՛ եւ Արագածի վրայ եղել է, բայց՝ չէ նկարագրել այն»:

Աշտարակում հիւրասիրում են Արովեանի հետ ծանօթ Ստեփան աղայի տանը: Գիւղը իր ալբիներով դուր է գալիս Վագներին: Բրնակիչներն էլ եղել են բարեկեցիկ ու դո՛հ իրենց վիճակից:

Հակառակ Մասիսի՝ գերման ճամբորդի աչքին զարնում է Արագածի ջրաշատ, աղբիւրաշատ ու կանաչաւէտ լինելը: Հիացք է պատճառում մանաւանդ լեռան ալպեան բուսականութիւնը՝ իր չքնաղ դեղեցկութեամբ: Վագներ բնականաբար Արագածի վրայ եւս ահագին նիւթ է հաւաքում իր բնապատմական հետազոտութեանց համար:

Նա ծանօթանում է լեռան լանջերին տարածուող Արարան գաւառակի հայ բնակչութեան կենցաղին ու վիճակին, միաժամանակ վերջիչելով նոյն այդ բնակչութեան գաղթի համառօտ պատմութիւնը: Գաղթը տեղի է ունեցել 1829 թ. Հին Բայազետի շրջանից:

Այդտեղից, ինչպէս նաեւ Վանից, էրզրումից, Կարսից եւ Թոփրաք-Կալէից Անգլիոյ կաս գաղթած հայերի թիւը Վագներ այս կապակցութեան մէջ հաշուում է 14,000 ընտանիք կամ 90,000 շունչ (համեմ. այս յօդուածի Ա. գլուխը), իսկ պարսկ. Ատրպատականից եկածների թիւը՝ աւելի քան 8,000 ընտանիք: Վերջին թիւը միսիոնար Ely Smith-ի վկայութեամբ 9,000 եղած պիտի լինի, ասում է Վ., իսկ իրենց տեղում մնացած հայ ընտանիքների թիւը՝ 2,500:

Արարանի նորեկ հայ գիւղացիներին մանրամասն հարցուփորձ անելով եւ անձամբ դիտելով նրանց կենցաղը՝ Վագներ ստանում է այն տպաւորութիւնը, թէ իրենց հին բնակավայրը նորով փոխարինած լինելով բախտաւոր չեն եղել նրանք: «Տաճկական հողի վրայ նրանք հարկաւ, շարունակ հեծում էին փաշաների ճնշումներից ու կեղեքումներից, ինչպէս նաեւ քրդերի աւազակութիւններից, եւ սակայն հին բնակավայրը աւելի մօտ էր նը-